

## అపొస్తుడు ఆతి పవులు తిమోతిజ్ రాస్తి ఉండ్రీ ఉత్రం

నెల్వ కిబిసినిక

అపొస్తుడు ఆతి పవులు తిమోతిజ్ రాస్తి ఉండ్రీ ఉత్రమ్నె యాక. ఎపెసి పట్టమ్దు మని దేవుణుదిజ్ నమ్మిత్తివరి సజమ్దిజ్ నడిపిన్ని వన్ని లెకెండ్ తిమోతిజ్ ఏర్పాటు కిత మనాన్. అందెజె, సజం నడిపిన్నిక ఎలాగ, నడిపిన్ని పాస్టరుజు, పెద్దెల్జు ఎలాగ మండ్రెజ్ ఇని దనివందిజ్ వెప్పినాన్.

ఎపెసి పట్టమ్దు నండో రకమ్కాణి గుడిజ్ మన్నె. దేసమ్కాజ్ నండో లోకుర్ బాన్ వానార్. అందెజె క్రీస్తు వందిజ్ నిజమాతి బోదదిజ్ కూడెకెజ్ నెస్పిన్నికార్ నండోడార్ మనార్. వరి వందిజ్ జాగ్రత మండ్రు. నని బోద తపిన్నివరిజ్ బాణిజ్ దూరం ఆదు ఇజి వెప్పినాన్.

1-2 క్రీస్తు యేసుజ్ అపొస్తుడు ఆతి పవులు ఇని నాను తిమోతిజ్ రాసిన్. నీను నా సొంత మరిన్ లెకెండ్ మని. ఎందనిజ్ ఇహిజు నానె నిజి దేవుణు దరొట్ తత. మజి రక్సిసిని దేవుణు వెహ్తి ఆడ్ర వజ, మాటు ఆసదాన్ ఎర్దు సుడెజిని క్రీస్తు యేసు వెహ్తి ఆడ్ర వజ, నాను క్రీస్తు యేసుజ్ అపొస్తుడు ఆత. బుబ్బ ఆతి దేవుణుని ప్రబు ఆతి క్రీస్తుయేసు దయా దర్మమ్దాన్, మీ ముస్సు కనికారం తోరిసి, మీరు నిపాతిదాన్ మండ్రెజ్ సాయం కిపిర్.

3-4 నాను మసిదోనియదు సొన్సి మహివలె నిజి వెహ్తి లెకెండె, నీను ఎపెసుదు మండ్రెజ్ వలె ఇజి నాను కసితం వెప్పిన. ఎందనిజ్ ఇహిజు, అబె సెగొండార్ తవు బోద నెస్పినినార్. వారు అయకెజ్ మరి ఎసెజ్బా నెస్పిన్తెజ్ ఆవద్ ఇజి నీను డటం వెహ్తెజ్ వలె. వారు డొక్టార్ వెప్పి మంజిని కత సాన్తరమ్క లొఇ, అంతు సిల్లెండ అని గొగొర్ వందిజ్ వెప్పిని సాన్తరమ్క లొఇ మన్ను ఇడెడెజ్ ఆవద్ ఇజి నీను డటం

వెహైజ్ వలె. అయాకెజ్ దేవుణు ఎత్తు కితి సజతిజ అడ్డు కిజి ఒరెన్ వెట ఒరెన్ తర్కిసిని సజతిజ్నె రేజ్జెనె. దేవుణు ముస్సు మని నమకం దానె, వాండ్రు ఎత్తు కితి సజతిజ్ నెస్సెజ్ఆనాద్.

5 నమ్మిత్తికార్, ఒరెన్ వెట ఒరెన్ ప్రేమిసి మండ్రెజ్. అందెజె నీను యా లెకెండే డటం వెహైజ్ వలె ఇజి నాను నిజి వెహ్సిన. నెగ్గి మన్సుదాన్ వాజిని ప్రేమదాన్, నెగెండ గదిసిని గర్బందాన్ వాజిని ప్రేమదాన్, దేవుణు ముస్సు మని నిజమాతి నమకమ్దాన్ వాజిని ప్రేమదాన్, ప్రేమిసి మండ్రెజ్.

6 నెగొండార్, ముస్సు వెహ్సె సజతిజ డిస్త సాహారె పణిదిజ్ రెకెజ్ వర్గిజినార్.

7 వారు దేవుణు మోసెజ్ సితి రూలుజ్ నెస్పిసినికార్ ఆదెజె కోరిజినార్. గాని ఇని దని వందిజ్ వర్గిజినార్ ఇజినో, నండో దయ్ రమ్దాన్ నిజమ్నె ఇజి వర్గిజిని సజతిజ వందిజ్నో, వారు నెస్ఎర్.

8 దేవుణు మోసెజ్ సితి రూలుజ్ వాడుకండెజ్ మని వజ వాడుకోటిజ, అయా రూలుజ్ నెగ్గికెజ్నె ఇజి మాటు నెస్నాట్.

9-11 మరి మాటు నెసినాట్, దేవుణు మోసెజ్ సితి యా రూలుజ్, నాయమ్దాన్ మని వరిజ్ వరి తపుజ్ దిదిదెజ్ సిఎన్ ఇజి. గాని రూలుజ్ తప్పి వరిజ్, లోజ్ ఇ వరిజ్, నమ్మి ఇ వరిజ్, పాపిన్టిజ్, దేవుణు బాణిజ్ వాజిని సజతిజ్ ఇజ్జి కణకదాన్ సూణి వరిజ్ మతమ్దిజ్ దూసిన్ని వరిజ్, అయిసి అప్పొసిరిజ్ సప్పి వరిజ్, లోకాజ్ సప్పి వరిజ్, రంకు బూలాని వరిజ్, మొకకొడో మొకకొడోరెనె కూడ్చి వరిజ్, వెట్టిపణి కిదెజ్ లోకురిజ్ అసి పొర్ని వరిజ్, అబద్దం వర్గిని వరిజ్, అబద్దమ్దిజ్ ఒట్టు కిని వరిజ్, నిజమాతి బోదదిజ్ విరోదం ఆతికెజ్ కిని వరిజ్, నని వరి వందిజె రూలుజ్ సిత మనాన్. నీను మహి లోకురిజ్ వెహ్ అ ఇజి, దేవుణు నజి ఒవజెప్తి సువార్తదు అయా నిజమాతి బోద మనాద్. లోకుర్ పొగిడిజిని కిజిని గొప్ప పెరి దేవుణు బాణిజె అయా సువార్త వాజినాద్.

పవులు ముస్సు దేవుణు తోరిస్తి కనికారం

12-13 ముజాల నాను యేసుప్రబు ఆతి యేసుక్రీస్తుజ్ దూసిస్తికాన్. నమ్మిత్తి వరిజ్ ఇమ్మెజ్ కిజి ఆహె వన్నిజ్ ఇమ్మెజ్ కితికాన్. వన్నిజ్ ప్రమెజ్ కితికాన్. అహిజ్బా నాను నమ్మిదెజ్ తగ్గికాన్ ఇజి వాండ్రు ఒడిఃబిజి, మహివరిజ్ సువార్త వెప్పిని వన్ని పణిదిజ్ నజి ఏర్పాటు కిత్తాన్. అందెజె నాను మా ప్రబు ఆతి క్రీస్తు యేసు నజి కితి దని వందిజ్ ఎసెజ్బా పోస్ఎండ మన. వాండ్రునె వన్ని పణి కిదెజ్ నజి సత్తు సితాన్. నాను యేసుజ్ నమ్మిఎండ మహివలె, తెలిఎండ అక్కెజ్ కిత. అందెజె దేవుణు నా ముస్కు కనికారం తోరిస్తాన్.

14 మా ప్రబు దయా దర్మమాదాన్, వన్నిజ్ నమ్మిదెజ్, మహివరిజ్ ప్రేమిస్తెజ్ నజి సాయం కిత్తాన్. క్రీస్తుయేసు వెట మాటు కూడిఃతి మని దని దటాన్, నమకమని ప్రేమ నజి దోహ్కె.

15 పాపం కిని వరిజ్ రక్సిస్తెజ్ క్రీస్తు యేసు లోకమదు వాతాన్ ఇని మాట నిజం ఆతిక. అయాక పూర్తి నమ్మిదెజ్ తగ్గిక. నాను కిత్తి పాపం నసా పాపం కినికార్ కివర్.

16 గాని, నసా పాపం కితి నా ముస్కు దేవుణు కనికారం తోరిస్తాన్. ఎందనిజ్ ఇహిజు, వాని కాలమదు యేసు ముస్కు నమకం ఇడఃజి, ఎలాకాలం దేవుణు వెట బత్తిని బత్తు దోహ్కె వరిజ్ నాను ఉండ్రీ గుర్తు లెకెండ్ ఆని వందిజ్, నసా పాపం కితి నజి, క్రీస్తుయేసు అంతు సిల్లెండ నంఠో ఓరిస్తాన్.

17 ఎలాకాలం రాజు ఆతి, ఎసెజ్బా సాఇ, నుడఃదెజ్ అల్ఃఇ ఒరెండ్రె దేవుణుజ్ ఎలాకాలం గవరం సీజి పొగిడిఃజి మనీర్. ఆమెన్.

18 నా మరీన్ లెకెండ్ మని తిమోతి యాకదె నాను వెప్పిని బుద్ది 'నీను కిదెజ్ మని వన్కా. వందిజ్ ప్రవక్తరు ముజాలె వెప్తా మనార్గదె. వారు వెప్తా వజనె నాను వెప్పిన. వారు వెప్తా మని వజి లోజిజి, తపు బోద నెన్పిస్సి వరిజ్ గటిజు ఎద్రిన్అ.

19 నా ముస్కు మని నీ నమకం డిఃస్సు. గర్బం గదిన్ఎండ నెగ్రిండ మన్అ. సెగొండార్, గర్బం గదిసి వెప్పిని దనిజ్ నెక్త పొక్తారె వరి నమకం పాడు కిత్తార్.

20 నని వరి లోక, హుమెనియ, అలక్సాండర్ ఇనికార్ మనార్. దేవుణుడి దూసిస్టెజ్ ఆవద్ ఇజి వారు నెస్సి వందిజ్, సయ్తాను కీదు నాను వరిజ్ ఒపజెప్త మన.

## 2

సజమ్దు పార్లనం కిని వందిజ్ వెప్పినాన్.

1 అందెజె మరి ముకెలం, లోకుర్ విజెరె వందిజ్, దేవుణుడి పార్లనం కిదెజ్. వరిజ్ కావాలిస్తికెజ్ సిఅ ఇజి బతిమాలజి లొస్టెజ్, వరి విజు వన్నా వందిజ్ ఎస్తివలెబా పార్లనం కిదెజ్, వాండ్రు విజెరిజ్ కితి మేలు వందిజ్ వన్నిజ్ వందనమ్కు వెహైజ్ ఇజి నాను మిజి ఉసార్ కిబిస్సు.

2 యా లెకండ్ రాజుర్ వందిజ్, అదికారమ్దు మని విజెరె వందిజ్ పార్లనం కిదెజ్. ఎందనిజ్ ఇహిజ, మాటు సాంతి సమాదనమ్దాన్ మహి వరి ఎర్దు నెగ్రెండ బత్కిదెజ్, దేవుణుడి తియెల్ ఆజి పూర్తి బక్తిదాన్ మండ్రెజ్.

3 యా లెకండ్ కినిక నెగెద్. మజి రక్కిస్సి దేవుణుడి ఇష్టం ఆతిక.

4 ఎందనిజ్ ఇహిజ, లోకుర్ విజెరిజ్ ఎల్లకాలం మని సిక్కుదాన్ తప్పిస్తిజ్ ఇజి, లోకుర్ విజెరె క్రిస్తు వందిజ్ నిజమాతి మాటెజ్ నెస్టెజ్ ఇజి దేవుణు కోరిజినాన్.

5 దేవుణు ఒరెండ్రె. దేవుణు, లోకుర్ నడిఃమి ఒపిస్సికాన్ ఒరెండ్రె మనాన్. అయా ఒరెన్ క్రిస్తుయేసునె.

6 వాండ్రు లోకుర్ విజెరె పాపమ్కాజ్, ఎల్లకాలం మని సిక్కుదాన్ తప్పిస్సి వందిజ్ సాదెజ్ వన్నిజ్ వాండ్రె ఒవజెపె ఆతాన్. యాకదె, దేవుణు ఏర్పాటు కితి కాలమ్దు, లోకుర్ విజెరిజ్ రక్కిస్తిజ్ దేవుణు కోరిజిని దనిజ్ సాస్యం.

7 అందెజె, ఒరెన్ సాటిస్సి వన్ని లెకెండ్, అపొస్తుడు లెకెండ్, నేర్పిస్సి వన్ని లెకెండ్, యూదురు ఆఇకార్ యేసు వందిజ్ నిజమాతి సజతిజ్ నెసి నమ్మిదెజ్, వరి వందిజ్ దేవుణు నజి ఏర్పాటు కిత్తాన్. ఈహు నజి ఏర్పాటు కిత్తాన్ ఇజి వెప్పినిక నిజమ్నె అబద్దం ఆవద్.

8 అందెజె, దేవుణుదిజ్ పార్లనం కిదెజ్ మీరు కూడఃజి వానివలె ఎంబెబా మొకకొడొఃర్ పార్లనం కిదెజ్ ఇజి నాను కోరిజిన. వారు దేవుణు వందిజ్ కేట ఆతి బత్తు బత్తిదెజ్ వలె. వారు పార్లనం కినివలె, వరి మన్సుదు కోపం సిల్లెండ, ఎయెవెటబ జటిజ్ ఆవిండ కిక్కు పెర్లి కిదెజ్.

9 అయాలెకెండ, దేవుణుదిజ్ పార్లనం కిదెజ్ మీరు కూడఃజి వానివలె, బోదెకు నెగ్రెండ తయార్ ఆజి, వన్కాజ్ తగ్గి వజ తయార్ ఆజి వాదెజ్. అవికు సోకుజాణిజ్ మూల కనినో, బజారమ్నో, నండో కరీద్ది పూసిజ్నో నండో కరీద్తి పాతెజ్నో పొరపాజి తయార్ ఆదెజ్ ఆవద్.

10 గాని దేవుణుదిజ్ నమ్మిజినికెజ్ ఇజి వెహె ఆని బోదెకు మహివరి వందిజ్ నెగ్గి పణిజ్ కిజి వన్కా సోకు తోరె ఆదెజ్.

11 మొకకొడొఃర్ నెన్పిస్సివలె, బోదెకు నెగ్రెండ వెంజి, జమ్న మంజి, వరిజ్ లోజిజి నెస్టెజ్.

12 మొక వరిజ్ నెన్పిస్టెజ్నో వరి మున్సు అతికారం కిదెజ్నో బోదెకాజ్ నాను నెల్వ సిఎ. అవికు జమ్న మండ్రెజ్.

13 ఎందనిజ్ ఇహిజ, దేవుణు అవ్వెజ్ ఆవద్, ఆదముజునె ముజాలె తయార్ కిత్తాన్.

14 సయ్తాను ఆదముజ్ ఆవద్, అవ్వెజ్నె మొసం కిత్తాన్. ఆహె అది పాపమ్దు అర్తాద్.

15 గాని అవికు దేవుణు మున్సు మని నమకం డిఃన్ఎండ, మహి వరిజ్ ప్రేమిసి, దేవుణుదిజ్ ఒపజెపె ఆతి లోకు వజ నెగ్రెండ బత్తిదెజ్. ఆహె బత్తిజి మహిజ, కొడొఃరిజ్ ఏరుఈబాని వలె దేవుణు బోదెకాజ్ రక్కిస్సాన్.

### 3

1 ఒరెన్ పాస్టరు ఆదెజ్ కోరిజినాన్ ఇహిజ, వాండ్రు నెగ్గి పణి కోరిజినాన్. యా మాట పూర్తి నమ్మిదెజ్ తగ్గిక.

2 పాస్టరు నింద సిలికాన్ ఆదెజ్ వలె. ఉండ్రె ఆల్ని మంజినికాన్, అణసె ఆజి మంజినికాన్ ఆదెజ్ వలె. నెగ్గి బుది మంజినికాన్, వని పణిజాణిజ్ తగమాతికాన్ ఇజి తోరె ఆదెజ్ వలె. వాతి వరిజ్ నెగ్రెండ డగ్గు కినికాన్ ఆదెజ్ వలె. దేవుణు మాట నెగ్రెండ నెస్పిస్సికాన్ ఆదెజ్ వలె.

3 వాండ్రు సోస్ఎండ, డెయ్సె ఆవండ మంజినికాన్, సార్లిదాన్ మంజినికాన్, జటిజ్ ఆవండ మంజినికాన్ ఆదెజ్ వలె. వాండ్రు డబ్బుదిజ్ ఆస ఇకాన్ ఆదెజ్ వలె.

4 వాండ్రు వన్ని సొంత ఇండ్రొణి వరిజ్ నెగ్రెండ నూణికాన్ ఆదెజ్ వలె. వన్ని కొడోర్ ఎస్తివలెబా విజెరిజ్ గవరం సీజి, వన్ని మాటదిజ్ లొజిజిని వరి లెకెండ వాండ్రు కిదెజ్.

5 ఎందనిజ్ ఇహిజ, సొంత ఇండ్రొణి వరిజ్ నెగ్రెండ నుడెదెజ్ నెస్ఇకాన్ ఇహిజ ఎలాగ దేవుణు సజం నడిపిస్సెజ్ అట్నాన్.

6 వాండ్రు కొత్తాజ్ నమ్మిత్తికాన్ ఆజి మండ్రెజ్ ఆవద్. ఎందనిజ్ ఇహిజ, కొత్తాజ్ నె వన్నిజ్ యా పెరి పణిదిజ్ ఏర్పాటు ఆత ఇజి గర్త ఆజి, సర్నూన్ ఎలాగ దేవుణు తీర్పు ఆజి సిక్కుదు అర్త మనాండ్రొ, అయ లెకెండ వీండ్రు బా అర్నాన్.

7 మహికార్ వన్ని వందిజ్ సెఇకెజ్ వెహ్ఎండ, సయ్తాన్ సికుదు అర్ఎండ మంజిని వందిజ్ నమ్మిఇ వరి ఎర్దు పల్కుబడిః మనికాన్ ఆదెజ్ వలె.

8 అయాలెకెండ, పెద్దెల్జు, విజెరె వన్నిజ్ గవరం సీదెజ్ తగ్గి వరి లెకెండ మండ్రెజ్. వారు రుండి నాలికెజ్ మన్ఇకార్ ఆదెజ్ వలె. వారు సోస్ఎండ, డబ్బు వందిజ్ ఆసగొటు ఆవండ మంజినికార్ ఆదెజ్ వలె.

9 దేవుణు ఏలు తోరిసి నెస్పిస్తి డాజితి మహి గొప్ప నిజమాతి సజతిజ్, వన్ని గర్బం వన్నిజ్ గదిసిని లెకెండ ఆవండ నెగ్రెండ మంజినికాన్ ఆదెజ్.

10 పెద్దెల్జు ఇజి వరిజ్ ఏర్పాటు కిని ముజాల, వారు నెగ్రెండ మంజినారా, నమ్మకమ్దాన్ పణి కిజినారా ఇజి సుడుదెజ్. నింద సిలికార్ ఇజి వారు రుజుప్ కితిజ, వారు పెద్దెల్జు పణి కిదెజ్.

11 అయాలెకెండ్, పెద్దల్జ బోదెకు, మహికార్ వరిజ్ గవరం సీని వరి లెకెండ్ మండ్రెజ్. అవికు సొండిజ్ వర్నిఎండ, సోస్ఎండ మండ్రెజ్ వలె. విజు దని లోఇబా మాపు నమ్మిదెజ్ తగ్గుకెజ్ ఇజి తోరె ఆదెజ్ వలె.

12 పెద్దెలి ఉండ్రె ఆల్ని మంజనికాన్ ఆదెజ్ వలె. వన్ని కొణ్డొరిజ్ వన్ని ఇండ్రొమని వరిజ్ నెగ్రెండ సుండేజి నడిపిన్నికాన్ ఆదెజ్ వలె.

13 నెగ్రెండి పణి కిని పెద్దెలి ఎయెన్ వన్నిజ్బా పల్కు బడిః మనాద్. క్రీస్తు యేసు ముస్కు మని వన్ని నమకం వందిజ్ వెప్తాజ్ వన్నిజ్ తియెల్ సిల్లెద్.

14 నీ డగ్గు బేగి వాదెజ్ ఇజి నాను ఆస ఆజిన. అహిజ్బా, నాను యా సజతిజ్ నిజి రాసిన.

15 ఎందనిజ్ ఇహిజ, నాను వాదెజ్ ఆల్సెం ఆతిజ, దేవుణు కుటుమ్దు ఒరెన్ ఒరెన్ ఎలాగ మండ్రెజ్ ఇజి నీను నెస్సిలె. బత్తిజిని దేవుణు సజమ్దికార్ విజెరెనె దేవుణు కుటుమ్దికార్. ఉండ్రె నిట కొహి ఉండ్రె ఇల్లు అర్ఎండ అన్ని లెకెండ్ దేవుణు సజమ్దికార్ దేవుణు వందిజ్ నిజమాతికెజ్ అస్సార్. అయాలెకెండ్, ఉండ్రె పునాది లెకెండ్ దేవుణు సజమ్దికార్ దేవుణు వందిజ్ నిజమాతికెజ్ అస్సార్.

16 మాటు నమ్మిజిని మతమ్దు మని, యేసుక్రీస్తు వందిజ్ ముజాలె డాఃజితి మహికెజ్, గాని ఏలు దేవుణు తోరిసి నెన్పిస్తి నిజమాతికెజ్ గొప్ప పెరిక ఇజి ఎయెర్బా ఒపుకొణార్. క్రీస్తు లోకు వజ లోకమ్దు వాతాన్. దేవుణు ఆత్మ, వాండ్రు నీతి నిజాయితి మనికాన్ ఇజి రుజుప్ కిత్తాన్. దేవుణు దూతార్ వన్నిజ్ సుండేతార్. లోకుర్ వన్ని వందిజ్ యూదురు ఆజ వరిజ్ వెప్తార్. లోకమ్దు ఎంబెబా, లోకుర్ వన్నిజ్ నమ్మితార్. పరలోకమ్దు దేవుణు వన్నిజ్ ఒత మనాన్.

## 4

తప్పుబోద నెన్పిసినికార్.

1 కడెఱెరి దినమ్కాజ్ సెగొండార్, వారు నమ్మిత్తి నిజమాతి మాటెజ్ డిసి, అబద్దం వర్గిని దెయమ్కు వెట సొనారె, అయా దెయమ్క బోద వినారె దనిజ్ లొజీనార్ ఇజి దేవుణు ఆత్మ టెటజ్ వెప్పినాన్.

2 అబద్దం వర్గిని వేసం కినికారె యా బోదెజ్ నెన్పిసినార్. ఇనుముదాన్ సుహాతిజు ఎలాగ మా తోలు సాతి లెకెండ్ ఆనాదొ అయ లెకెండ్ వరి గర్బం గదిస్ఎండ సాత మనాద్.

3 పెండ్లి అనిక తవు ఇజి, సెగం రకమ్కాణి ఉణి తినికెజ్ తిండ్రెజ్ అవిద్ ఇజి వారు నెన్పిస్సార్. గాని దేవుణుదిజ్ నమ్మిత్తి, నిజమాతి మాటెజ్ నెస్తికార్, దేవుణుదిజ్ వందనమ్కు వెప్పి తిండ్రెజ్ ఇజినె దేవుణు అయాకెజ్ తయార్ కిత్తాన్.

4 ఎందనిజ్ ఇహిజు, దేవుణు తయార్ కితికెజ్ విజు నెగ్గికెజె. ఇనికబా నెక్కి పొక్కిక అవెద్. గాని దేవుణుదిజ్ వందనం వెప్పి అయకెజ్ తిండ్రెజ్.

5 ఎందనిజ్ ఇహిజు, దేవుణు మాటదాన్, పార్దనదాన్ దేవుణు వందిజ్కేట ఆతికెజ్ ఆతె మన్నె.

6 నీను యా సజతిజ్, నీ సజమ్దు మని తంబెర్సిరిజ్ నెస్సిసి మహిజు, నీను క్రిస్తు యేసుజ్ నెగ్గి పణి మనిసి ఆని. దిని వెట, ఏలుదాక నీను నమ్మిజిని నీ నమకం వందిజ్ వెప్పిని మాటదాన్ నిజమాతి నెగ్గి బోదదాన్ నీను నమకమ్దు పిరిఅ

7 వర్గిదెజ్బా విలువ సిలి, డొక్రార్ వెప్పి మంజిని కత సాన్తరమ్కాణిజ్ నీను దూరం మన్అ. గాని దేవుణు వందిజ్ తియెల్ ఆజి బక్తిజి మండ్రెజ్ నీను ఒజ్జ ఆఅ.

8 ఒడొల్దిజ్ రూణు వాక్కి ఒజ్జ కితిజు నెగెద్. గాని దేవుణు వందిజ్ తియెల్ ఆజి బక్తితి మహిజు, విజు వన్నా లొఇ గొప్ప లాబం మంజినాద్. ఎందనిజ్ ఇహిజు, అయాలెకెండ్ మహిజు, ఏలుబా నెగ్గి బత్తు మంజినాద్, వాని కాలమ్దుబా నెగ్గి బత్తు మంజినాద్ ఇజి ఒట్టు కిజినాద్.

9 నాను మున్ను వెప్తి సజతి నమ్మిదెజ్ తగ్గిక. పూర్తి నమ్మిదు.



10 బత్కిజిని దేవుణు ముస్కునె మా ఆస మాటు ఇట్టా మనాట్. అందెజె మాటు అయా నెగ్గి బత్కు వందిజ్ నండొ అరల ఆజి కన్ఱబడిఃజినాట్. వాండ్రె లోకుర్ విజెరిజ్ ముకెలం వన్ని ముస్కునమకం ఇడ్డి వరిజ్ రక్కిన్సికాన్.

11 నీను యా సజతిజ్ నీ సజమ్దు మని వరిజ్ నెస్పిసి, ఆహె కిడెజ్ ఇజి డటం వెహ్అ.

12 నీను దజడః ఇజి, ఎయెర్బా నిజి ఇజ్జి కణక సుడఃఎండ నీను నిజి సుడఃఅ. గాని నీను వర్గిని మాటదు, నడిని నడఃకదు, నీను ప్రేమిన్సి ప్రేమదు, దేవుణు ముస్కు మని నీ నమకమ్దు, ఇని పాపం సిలి నీ బత్కుదు, నమ్మిత్తి వరిజ్ ఉండ్రె గుర్తు లెకెండ నీను మన్అ. వారు నిజి సుడఃజి అయాలెకెండ మండ్రెజ్, నీను గుర్తు లెకెండ మన్అ.

13 నాను వానిదాక, నీను విజెరిజ్ దేవుణు మాట సద్విజి విన్పిసిసె, బోదిసిసె, నెస్పిసిసె మన్అ.

14 సజం వెద్దెల్జు నీ ముస్కు కికు ఇట్టివలె, ప్రవక్తరు నీ వందిజ్ వర్గితి దని వెట, దేవుణు ఆత్మ నిజి సీతి వరం డిఃన్ఎండ, నీను అయాక కిఅ.

15 యా సజతిజ్ నీను జాగర్తదాన్ కిఅ. నీ మన్పు విజు, దిని ముస్కునె ఇడఃఅ. ఎందనిజ్ ఇహిజు, నీను నమకమ్దు పిరిజినిక లోకుర్ విజెరె టటజ్ సుడఃదెజ్. అందెజె, నీ మన్పు విజు దని ముస్కునె ఇడఃఅ.

16 నీను కిజిని పణి నెగ్రెండ కిఅ. నీను నెస్పిసిని బోదదు తపు సిల్లెండ నెస్పిన్అ. నీను అయకెజ్ డిఃన్ఎండ కిజి మన్అ. ఎందనిజ్ ఇహిజు, నీను అయ లెకెండ కితిజు, ఎలాకాలం మని సావుదాన్ నిజి నీనె తప్రె ఆనిలె. నీను వెహ్నికెజ్ వెని వరిజ్బా తప్రిన్సిలె.

## 5

1-2 నీ సజమ్దు మని డొకెజ్ జటిజ్ ఆవండ వన్నిజ్ బుబ్బు లెకెండ ఒడిఃబిజి, పణిసి వెహ్అ. దజడాఃరిజ్ తంబెరిజు లెకెండ సుడఃఅ. డొక్రికాజ్ యాయెక్ లెకెండ సుడఃఅ. దజడిఃకాజ్ తపు ఆలోసనదాన్ సుడఃఎండ, తజిక్ లెకెండ సుడఃఅ.

3 దిక్కు సిల్లి రాండి బోదెకాజ్ గవరం సిఅ.

4 ఎంబెణి రాండి బోదెలదిజ్బా కొణ్ణోనో నాతిసిన్ నో మహిజ, వీరు వరి సొంత ఇండ్రోణి వరిజ్ సుడెదెజ్ వలె. సొంత ఇండ్రోణి వరిజ్ సూణికాదె దేవుణుదిజ్ సేవకిని వందిజ్ ముకెలమతిక ఇజి ముజాలె నెస్తెజ్ వలె. అయ లెకెండ అయ్సి అప్పొసిజ్, అని అమ్మెజ్ రుణం తీర్సినార్. ఎందనిజ్ ఇహిజ, అయాక దేవుణుదిజ్ ఇస్తం ఆతిక.

5 దిక్కు సిలి రాండి బోదెలి దేవుణు ముస్కునె వాండ్రు కావలిస్తెకెజ్ విజు సీనాన్ ఇజి, దని ఆస ఇట్టా మనాద్. అది రెయు పొగాల్ పార్దనం కిజి, వన్ని సాయం లొసి మంజినాద్.

6 గాని ఉణిజి, తింజి సుకం వందిజ్ బత్తిజిని రాండి బోదెలి బత్తిజిజ్బా ఆత్మియ బత్తు సాతి లెకెండ మనాద్.

7 మహికార్ ఎయెర్బా వరిజ్ దుసలాడెఎండ మంజిని వందిజ్, నీను సజమ్దు మని నమ్మిత్తి వరిజ్ యా సజతిజ్ ఆడ్ర సిఅ.

8 ఎయెన్బా వన్ని కుటుమ్ది వరిజ్, ముకెలం వన్ని సంత ఇండ్రోణి వరిజ్ సుడెఎండ మహిజ, వన్ని నమకం డిసి లెకెండె దేవుణు ఎద్రు మనాన్. వాండ్రు నమ్మిఇ వన్ని ఇంక నండో సెకాన్.

9 ఉండ్రీ రాండి బోదెల్దిజ్ అరువయ్ పంటెజ్ లావు మహిజనె, దనిజ్ రాండి బోదెక్ లెక్కాదు కూడువ్అ. మరి, అది ఒరెన్ వన్నిజె పెంట్టి ఆతిమహికాద్ ఆదెజ్ వలె.

10 నెగ్గి పణిజ వందిజ్ నెగ్గికాద్ ఇజి పేరు అనుపె ఆతికాద్ ఆదెజ్. ఇహిజ, దని కొణ్ణోరిజ్ నెగ్రెండ పోస కితాదా, నెల్వ సిల్లి వరిజ్బా డగ్రు కిజి నెగ్రెండ సుడెతదా, దేవుణుదిజ్ నమ్మిత్తి వరి పాదమ్కు నొర్జి మహదా, కస్టమ్దు మని వరిజ్ సాయం కిజి మహదా, విజు నెగ్గి పణిజ వందిజ్ దనిజ్ అది నె ఒపజెపె ఆజి మహదా, ఇజి సుడెదెజ్. యా లెకెండ మని వన్మాజ్ లెక్కాదు కూడువ్అ.

11 దజుడి: కాలమ్దు రాండి ఆతి బోదెకాజ్ లెక్కాదు కూడుబమ. ఎందనిజ్ ఇహిజ, సెగం కాలం వెన్మా అవికు మన్ను అస్తెజ్ అట్ఎండ పెండ్లి ఆనె. ఆహె క్రీస్తుజ్ డి:స్సె.

12 అయావలె, మరి పెండ్లి ఆవ ఇజి దేవుణు పణినె కిన ఇజి ముజుల కితి ఒట్టు తప్పినె. అందెజె, అవికు తప్ప ఇజి లోకుర్ బాణిజ్ వెహె ఆనె.

13 మరి అవికు బదకం ఆజి ఇల్కు ఇల్కు బూలాదెజ్ ఒజ ఆనె. బదకమ్నె అవిండ సొండిజు వర్గిజి మహి వరి సజతిజ జోలి కినె. వర్గిదెజ్ ఆఇకెజ్ వర్గినె.

14 అందెజె, దజడిః కాలమ్దు రాండి ఆతి బోదెకు పెండ్లి ఆజి, కొడోర్ ఇడఃజి, ఇండ్రోణి పణి సుడఃజి మండ్రెజ్ ఇజి నాను కోరిజిన. ఆహె, సజమ్దిజ్ దూసిస్తెజ్ పడఃఇ వన్నిజ్ అవసరం సీదెజ్ ఆవద్ ఇజి నాను కోరిజిన.

15 దజడిః కాలమ్దు రాండి ఆతి సెగొండెక్ నమకం డిస్తెనె సయ్తాన్ వెట సొహె.

16 దేవుణుదిజ్ నమ్మిత్తి ఉండ్రీ దని కుటుమ్దు రాండి బోదెక్ మహిజ, అది వన్కాజ్ సుడఃదెజ్ వలె. వెన్క బాజిత సజమ్దు ఒవజెప్తెజ్ అవద్. ఎందనిజ్ ఇహిజ, దిక్కు సీలి రాండి బోదెకాజ్ సుడఃదెజ్ సజం ఆనాద్.

17 దేవుణు సజం ఏలుబడిః కిజిని పెద్దెల్జ, ముకెలం కస్టబడిఃజి దేవుణు మాట బోదిసి నెస్పిసిని వరిజ్ వరి జితమ్దిజ్ మరి నసొనె కుడుఃప్పి లొసె ఆదెజ్ వారు తగ్గికార్.

18 ఎందనిజ్ ఇహిజ, “కలమ్దు మటిసిని డాఃను మూతుదు కిమ తొహమాట్’ ఇజి, “పణికినికాన్ జితమ్దిజ్ తగ్గికాన్’, ఇజి దేవుణు మాటదు వెహెనాద్.

19 ఒరెన్ పెద్దెలి మున్కు మోప్తి నేరమ్దిజ్ రిఎర్ ముఎర్ సొసిరు మహిజనె అయాక నమ్మిదెజ్.

20 మహికార్ తప్పుదిజ్ తియెల్ ఆజి మంజిని వందిజ్ పాపం కిజినె మంజిని పెద్దలుజ వరి సజమ్దు మని విజెరె ఎద్దు డటం దిదిఆ.

21 ఇజ్రికాన్ పెరికాన్ ఇజి తేడ తొఎండ నాను మున్కు వెప్తి సజతిజ్ నీను కిదెజ్ వలె ఇజి దేవుణు ఎద్దు, క్రీస్తుయేను ఎద్దు, ఏర్పాటు ఆతి దేవుణు దూతార్ ఎద్దు నాను నిజి ఆడ్ర సీజిన.

22 గబి బిజి, ఎయెరి ముస్సుబా పెద్దెలి పణి వందిజ్ కిక్కు ఇణ్ణి దీవిస్సు. మహి వరి పాపమ్కాజ్ వెట కూణ్ణి మన్అ. విజు పాపమ్కాజ్ నీను దూరం మన్అ.

23 నీను ఉణ్ణిజనిక అర్గిని వందిజ్, డిన్ఎండ వాజిని జబ్బు వందిజ్ ఏరునె ఉణ్ణిఎండ, బుకెండ్ ద్రాక్కు కల్లుబ ఉణ్అ.

24 సెగొండార్ కిజిని పాపమ్కు విజెరె ఎద్దు తోరజినె. వారు, తీర్పు తిరసె ఆదెజ్ సొని ముజాలె, తీర్పు సీనికార్ వరి సజతి నెసినార్. గాని మరి సెగొండారి పాపమ్కు వెనుకనె తెలిసె.

25 అయాలెకెండ్, సెగొండార్ కితి నెగ్గి పణి విజెరె ఎద్దు తోరజినె. విజెరె ఎద్దు తోరజక ఎసెజ్బా డాజ్జి మండ్రెజ్ అట్ఉలె.

## 6

### వెటిపణి కినికార్ ఎలాగ మండ్రెజ్

1 దేవుణుదిజ్ నమ్మితి వెట్టిపణి కినికార్ విజెరె వరి ఏజుమానురిజ్ సీని గవరం విజు సీదెజ్. ఎందనిజ్ ఇహిజ, ఎయెర్బా దేవుణు పేరుదిజ్, యేసు వందిజ్ మాపు నెస్పిసిని మాటదిజ్ దూసిన్ఎండ మంజిని వందిజ్ వరిజ్ సీదెజ్ మన్ని గవరం సీదెజ్.

2 వరి ఏజుమానిరు నమ్మిత్తికార్ ఇహిజ, వారు మా తంబెరిజునెగదె ఇజి తక్కు గవరం సీదెజ్ ఆవద్. గాని వారు మరి ఒదె ఏజుమానిరు వందిజ్ పణికిదెజ్. ఎందనిజ్ ఇహిజ, వారు ప్రేమిసిని నమ్మిత్తి వరిజె వారు కిజిని పణిజ్జిణ్ణి మేలు వాజినె. నీను యా సజతిజ్ నీ సజమ్దు మని వరిజ్ నెస్పిసి, డటం వెహ్తాజ్ వలె.

### డబ్బు వందిజ్ ఆస ఆదెజ్ ఆవద్.

3-5 ఎయెన్బా యేసుప్రబు వందిజ్ ఆఇ బోదెజ్ నెస్పిసి, మా ప్రబు ఆతి యేసుక్రీస్తు వెహ్తి నిజమాతి బోదెజ ఒపుకొండెండ, దేవుణు బక్తిదాన్ కూడితి మని బోదెజ ఒపుకొండెండ మనికాన్ గర్దాన్ నిండ్రిత మనాన్. వన్నిజ్ ఇనికబా తెలివద్. వన్నిజ్ అవ్సరం మన్ని దన్నిజ్, అవ్సరం సిల్లి దన్నిజ్ విజు వన్కా వందిజ్ తర్కిస్తెజ్ పెరి ఆస మనాద్. క్రీస్తు వెహ్తి మాటిజ అర్లం వందిజ్ జటిజ్ ఆనాన్. యా

లెకెండ కినిక, గోస, జటిజ్, దుసలాడేనిక, సెఇ అనుమానమ్కు విజు పుటిస్సు. ఎస్తివలెబా గొడేబెజ్ పుటిస్సు. యా లెకెండ తర్కిస్సివరి బుద్ది సెద్దిత మనాద్. వరి లొఇ నిజమాతి బోద సిల్లెద్. క్రీస్తు మతం వందిజ్ వెప్పి, ఆస్తి గణస్తెజ్ ఇజి వారు ఒడేబిజినారి.

6 దేవుణుదిజ్ ఇస్టం ఆతివజ బత్కిజి, దన్ని దటాజ్ నర్దె ఆజి, నజీ యాకదె సాలు ఇజి ఎత్తు కిని వన్నిజ్ గొప్ప లాబం మనాద్

7 ఎందనిజ్ ఇహిజ, మాటు పుట్టివలె ఇనికబా యా లోకమ్దు తెప్పెత్తెట్. మాటు సానివలె యా లోకమ్దాన్ ఇనికబా ఒత్తెట్ అట్టెట్.

8 అందెజె, మజీ ఉణిక మహిజ, పొర్పాదెజ్ పాత పర మహిజ, అయాకదె మజీ సాలు.

9 గాని ఆస్తి మన్నికానాదెజ్ కోరిజనికాన్ డబ్బు గణస్తెజ్ ఇని ఆసెజి సిక్కుదు అర్నాన్. బుద్ది సిలి పాడు కిని నండొ ఆసెజ్ ఉరి లెకెండ ఆజి, అయాకెజ్ వన్నిజ్ పాడు కినె, నాసనం కినె.

10 ఎందనిజ్ ఇహిజ, ఉండ్రీ మొకదిజ్ వెల ఎలాగ మంజినాదొ, అయ లెకెండ విజు సెఇ పణిదిజ్ డబ్బు ఆసనె వెల. సెంగొండార్ డబ్బుదిజ్ ఆస ఆజి, వారు నమ్మిత్తి నిజమాతికెజ్ డిసి, వరి మన్ను కూడం గుత్తి సొహిజ ఎలాగ మంజినాద్, అయ లెకెండ వరిజ్ వారె నండొ బాదెజ్ కల్లిస్తె.

11 గాని దేవుణు లోకు ఆతి నీను యా సెఇ ఆసెజాణిజ్ దూరం మన్అ. నీతి నిజయ్యాకెజ్ని నెగ్గెకెజ్ కిజి దేవుణు బక్తిదు మన్అ. దేవుణుదిజె నమ్మిజి మహి వరిజ్ ప్రేమిసి, కష్టమ్కు ఓరిసి, సార్లిదాన్ మన్అ.

12 నీను యేసుక్రీస్తుజ్ నమ్మితిజ్ కష్టమ్కు వానె. వన్కాజ్ నీను గెలస్తెజ్ నీను నెగ్గెండ సుడేఅ. నీను అయాలెకెండ గెలస్తిజ, ఎలాకాలం బత్కిని బత్కు దొహ్కాద్. దిని వందిజె దేవుణు నిజి కూక్త మనాన్. 'నాను క్రీస్తుజ్ నమ్మిజిన', ఇజి నండొ లోకుర్ ఎద్దు నీను ఒప్పకొటివలె, నని బత్కు వందిజె దేవుణు నిజి కూక్తాన్.

13-14 విజు వన్కాజ్ పాణం సీజని దేవుణు ఎద్దుని పొంతి పిలాతు ముజాలె వెన్బాతివలె, దయ్ రమ్దాన్ నెగ్గెండ ఒప్పకొటి క్రీస్తుయేసు

ఎద్దు నాను నిజి ఆడ్ర సీజిన. మా ప్రబు ఆతి యేసుక్రీస్తు వాని దినమ్దాక నీను పాపం సిల్లెండ, నిందెజ్ సిల్లెండ నాను నిజి వెప్తి సజతిజ్ కిజి మన్అ ఇజి ఆడ్ర సీజిన.

15 దేవుణు వీర్పాటు కితి సమయమ్దు యేసుప్రబుజ్ వాండ్రు రపిస్సాన్. గొప్ప పెరికాన్ ఆతి విజు వన్కా ముస్సు ఒరెండ్రె అతికారం మనికాండ్రె దేవుణు. వాండ్రు రాజురిజ్ ఇంక పెరి రాజు. ప్రబురిజ్ ఇంక పెరి ప్రబు.

16 వాండ్రు ఒరెండ్రె ఎసెజ్బా సాఇకాన్. డగ్రు సాండ్రెజ్ అట్ఇ నసా జాయ్దు బత్తిజినాన్. వన్నిజ్ ఎయెర్బా ఎసెజ్బా తొవర్. ఎయెర్బా ఎసెజ్బా నుండెజ్ అట్వర్. వన్నిజె విజు గవ్ రమ్ని ఎలాకాలం అతికారం మనిద్, ఆమెన్.

17 యా లోకమ్దు ఆస్తి మనికార్, గర్త్ర ఆవండ, ఆస్తి ముస్సు ఆన ఆవండ మండ్రెజ్ ఇజి నీను డటం వెహ్అ. యా ఆస్తిదిజ్ నమ్మిదెజ్ అట్ఇక. గాని వరి ఆన దేవుణు ముస్సు ఇండెజ్ ఇజి నీను వెహ్అ. నుకమ్దాన్ సర్ద ఆజి మండ్రెజ్ దేవుణునె తకు సిల్లెండ విజు సీనికాన్.

18 వారు మహి వరిజ్ నండొ మేలు కిదెజ్, నండొ నెగ్గి పణిజ్ కిదెజ్, నీను వారు ఆవండ, నండొ సీబాజి సీనికార్ ఆదెజ్ ఇజి నీను వరిజ్ వెహ్అ.

19 అయాలెకెండె, వాని కాలమ్ది వరి బత్తు వందిజ్ వారు ఉండ్రీ నెగ్గి పునాది తయార్ కిజినార్. ఎందనిజ్ ఇహిజు, అయావలె వరిజ్ దేవుణు వెట ఎలాకాలం బత్తిని బత్తు దొహ్కాద్.

20 ఓ తిమోతి, దేవుణు నిజి ఒపజెప్తి సేవ పణి నీను నెగ్రెండ నుండెఅ. పణిదిజ్ రెఇ సెఇ మాటెజు వర్గిఎండ దూరం మన్అ. అర్దం సిల్లెండ తర్కిన్ని వన్కాజ్ దూరం మన్అ. దనిజె సెంగొండార్ అబద్గమ్క గెణం ఇజి కూక్కినార్.

21 సెగొండార్, 'అయాక నజి మనాద్', ఇజి ఒపుకొటారె, యేసు వందిజ్ నిజమాతి సజతిజ్ డిస్త సొహార్. దేవుణు దయా దర్తం మీ వెట మనిద్.

**Konda: కొండ బాసడు నెగ్గి కబ్బు**  
**Konda Dora New Testament which was published in**  
**2006**

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

---

PDF generated using Haiola and XeLaTeX on 6 May 2025 from source files  
dated 7 May 2025

840896da-3a66-5e43-9018-4a95a349d60c